

四庫全書

史部

欽定四庫全書

史部

欽定八旗通志卷

一百五十六至
一百五十七

欽定四庫全書

欽定八旗通志卷一百五十六

人物志三十六

大臣傳二十二

滿洲正白旗一 扈爾漢 武理
堪 康果禮 景固勒岱 達音

布 英俄爾岱 蘓納 阿什達爾漢 薩穆什
喀 雅賴 巴篤理 蒙阿圖

扈爾漢

扈爾漢姓佟佳世居雅爾古寨後隸滿洲正白旗

太祖高皇帝戊子年從其父扈喇虎率所屬來歸

恩遇之賜姓覺羅尋授一等大臣居五大臣之列扈爾漢

感

上撫育恩誓以戎行効死每出戰輒為前鋒瓦爾喀部蜚
悠城長策穆特黑者苦烏喇貝勒布占泰之虐請

內附

上命扈爾漢隨貝勒舒爾哈齊往徙之扈爾漢以兵三百
護五百戶先行烏喇聞之遣萬人邀諸路扈爾漢
結寨山巔分百人衛降者身率二百人與烏喇軍

相持不下翼日敵悉衆來戰同揚古利擊却之丁
未年從貝勒巴雅喇等征東海窩集部有功己酉
年復率兵千人征窩集部所屬濬野路盡降其部
落收二千戶而還

太祖嘉之賞甲冑駟馬

賜號達爾漢辛亥年同何和里等征窩集部之呼爾哈路
圍扎庫塔城三日攻克之癸丑年從征烏拉乘勢
奪門遂克其城天命元年同安費揚古統兵二千

征東海薩哈連部至兀爾簡河剽舟二百水陸並
進收河南北三十六寨黑龍江北十一寨又招降
使犬諾洛石拉忻諸部長四年明兵四道來侵扈
爾漢從擊撫順開原二路大敗其衆明總兵劉綎
復由寬奠口進棟鄂路扈爾漢先奉

命率大兵千人伏山隘以扼其衝衆貝勒繼至引左右兩
翼兵夾攻綎倉卒不及陣殲其兵五萬人綎戰死
先是扈爾漢率兵往禦棟鄂路遇明遊擊喬一琦

擊敗之一琦奔孤拉庫崖朝鮮營自縊死明年

上復征明扈爾漢從又擊敗明總兵賀世賢等軍於瀋陽
歷加世職至三等總兵官八年十月卒年四十八

太祖親臨哭之以其子渾塔襲職

武理堪

子武拜

武理堪姓瓜勒佳世居義屯父伊蘭柱徙居哈達
之費德里

太祖高皇帝未滅哈達時武理堪來歸歲癸巳葉赫貝勒

布齋糾哈達烏拉輝發科爾沁席北卦爾察珠舍
里訥殷諸路兵來侵武理堪奉

命偵敵出東道百餘里將陟嶺羣鴉噪集馬前若阻其行
武理堪心異之自度與敵左馳歸以告復奉

命出扎喀路薄暮至渾河敵營河北方會食武理堪擒葉
赫一卒訊之言敵衆三萬將乘夜渡沙濟嶺而進
遂携以還報時夜方半傳

諭諸將俟達旦出師我兵有謂敵兵衆者武理堪宣言曰

敵雖衆心不一誰能禦我及戰諸路敵兵果潰布
齋為我兵吳談所殺天命四年明分兵四路來侵
太祖親統師擊之敗其三路兵明經畧楊鎬檄總兵李如
柏引兵還瀋陽武理堪率二十騎至呼蘭山見敵
軍行山麓乃於山嶺駐馬大呼手弓四顧為指麾
伏兵狀敵望見驚潰武理堪遂縱騎疾馳擊之斬
四十人獲馬五十敵相蹂踐死者千餘初定滿洲
旗制武理堪隸正白旗分轄人戶為佐領每有征

伐任前鋒統領既卒

太祖追念曰武理堪從朕摧鋒陷陣幾死者數矣以其長子武拜襲管佐領事武拜年十六即隨大軍畧明撫順所遇敵輒奮戰矢中顙不顧嘗從

太祖出獵有熊突圍騰上峻嶺

太祖遙見一人躍馬射熊貫胸而墮

諭侍臣雅蓀曰是非武拜不能

遣視之果然復

諭諸皇子曰武拜之勇今共見之矣遂授侍衛天命四年
從征葉赫負重創力戰不退師還

賜良馬是時明總兵毛文龍誘我新附之衆往歸皮島武
拜循徼三日擒八十餘人其來誘者乘騎遁追及
射殪之還奏即以所獲

賜之管轄六年從征明破敵於南壽山授騎都尉世職遠
陽既下諸將分隸所俘有差

太祖以武拜能繼父志年少建功

命視一等大臣例隸千人十一年蒙古巴林部貝勒囊努克背盟剽掠武拜隨大軍征之我諜者為敵困援之出殲敵百人

太宗文皇帝初即位擢列十六大臣佐理鑲白旗事奉命追捕叛逃蒙古至都爾弼有十五人拒戰武拜既被創仍奮擊盡殲之

太宗諭諸大臣曰是固

先帝數嘉許者

特予優賚天聰四年大軍取明永平灤州武拜隨貝勒阿敏守永平聞明兵圍灤州率護軍馳援乘夜破明步兵營會阿敏棄永平武拜隨歸逮繫論罪以其曾夜入敵營破敵

命釋其縛尋授前鋒叅領五年從征明圍大凌河城同叅領蘇達喇赴錦州偵敵有斬獲六年從征察哈爾率精銳先驅遇叛逃蒙古五人斬首以獻察哈爾林丹汗携其丁壯牲畜渡黃河西奔土默特部大

軍還克歸化城武拜奉

命撫輯降戶八年征明大同額駙多爾濟將中軍前鋒統領圖魯什將左軍武拜將右軍明總兵曹文詔迎戰敗之復同叅領席特庫薩海設伏宣府擒明守備殲其游騎尋與承政阿什達爾漢等招察哈爾汗之子額哲及其大臣來歸九年五月明屯兵大凌河西武拜與都統阿山石廷柱圖賴邀截其歸路陣斬副將劉應選殲步騎五百餘擒遊擊曹得

功及守備三人攻克松山城南臺堡師還復設伏
敗敵兵叙功晉三等輕車都尉世職是時

上遣諸貝勒征明朔州代州忻州

命武拜率兵駐上都城舊址偵軍事會軍中遣使奏捷遂
與俱歸崇德元年同前鋒統領勞薩等齎書至喜
峯口潘家口

諭明守邊將吏斬其邏卒二十三人擒二人獲馬十是年

冬

上親征朝鮮

命同承政馬福塔等率兵三百先行襲其國都敗拒戰兵國王李倬潛遁南漢山城大軍進圍之武拜與勞薩殲敵援兵二百餘二年授前鋒統領列議政大臣時叅領丹岱阿爾津等往土默特貿易將還

遣武拜率將校赴歸化城護之遇明哨卒十六人斬十五人獲馬十九擒一人以還三年四月畧明寧遠遂敵墮壕塹斬殪甚衆八月率兵八十人至洪山口

遇明兵斬其裨將二擊走羅文峪騎兵五百奪其
纛獲馬四十又殲密雲步兵百餘五年與勞薩率
兵過中後所畧海濱斬級二百獲馬羸牲畜旋受
上方畧策應圍錦州大軍駐要隘屢擊敗敵兵明年春以
大軍攻圍錦州弗力論統師王貝勒及諸將罪武
拜坐罰鍰秋

上親征松山明兵敗遁武拜未截擊

命拘繫旋釋之七年隨貝勒阿巴泰入明邊敗敵於豐潤

三河靜海及青州八年隨鄭親王濟爾哈朗取明
中後所前屯衛是年十一月改任正白旗副都統
世祖章皇帝順治元年隨睿親王多爾袞入山海關擊敗
流賊李自成追至望都逾年解副都統任列內大
臣三年蘇尼特部長騰機思叛武拜隨豫親王多
鐸征之斬獲無算四年同輔國公鞏阿岱內大臣
何洛會率兵駐防宣府先是兩叙軍功晉一等輕
車都尉至是論征騰機思功晉爵一等子屢遇

恩詔晉二等伯八年同內大臣洛什博爾輝等舉發英親王阿濟格謀干政事優叙三等侯未幾洛什博爾輝以諂媚諸王造言構釁伏誅武拜坐附和削職籍沒十五年

世祖念武拜戰陣功

命復一等子爵世襲罔替康熙四年四月卒年七十

賜祭葬如例諡曰果壯子郎坦襲爵別有傳

康果禮

子邁色

康果禮先世居那木都魯以地為氏歲庚戌

太祖高皇帝命巴圖魯額亦都率兵千人征東海窩集部
招降那木都魯寧古塔尼馬察諸路屯長昂古明
安圖巴顏烏祿喀僧格尼喀里泰松阿等時康果
禮為綏芬屯長與其弟喀克都哩哈哈納綽和納伊
勒占蘇爾休率丁壯千餘來歸

賜金幣宴勞授康果禮喀克都哩三等子哈哈納三等男
綽和納三等輕車都尉伊勒占蘇爾休騎都尉分

轄其衆為世管佐領六隸滿洲正白旗旋以貝勒
穆爾哈齊女妻康果禮封和碩額駙天命三年大
兵征明取撫順克撫安三岔等十一堡進雅鶻闕
破清河城康果禮並在事有功六年從大兵征明
瀋陽樹雲梯先登遂克其城

太宗文皇帝初即位以康果禮列十六大臣佐理正白旗
事尋擢護軍統領天聰元年隨大貝勒阿敏征朝
鮮凱旋分

賜所俘獲三年從

上征明入洪山口克遵化城薄燕京

上親統大軍駐德勝門外明寧遠巡撫袁崇煥錦州總兵

祖大壽率兵二萬赴援屯於城東南

上命康果禮隨諸貝勒擊之諸貝勒擊敗敵兵俱追至城

壕康果禮與叅領郎球漢岱等未至城壕而返並

論罪削爵罰鍰奪俘獲五年卒子六人次子色琥

德承管佐領第三子邁色任護軍叅領隨征明錦

州禦敵塔山歿於陣第四子賴塔別有傳

景固勒岱

從弟崇阿

景固勒岱姓扎庫塔初居呼爾哈部烏拉招之降
不從

太祖高皇帝遣兵征東海窩集部景固勒岱聞風徒步來
歸遂隨征呼爾哈部追獲叛逃降人偕衆攻取烏
爾固辰路斬獲甚衆尋携其家室兄弟及所屬三
十戶俱至隸滿洲正白旗任佐領天命三年從

上征明進鴉鵲關攻克清河城擢叅領仍兼佐領後大軍
取明瀋陽遼陽景固勒岱並在事有功

太宗文皇帝天聰八年五月予二等輕車都尉世職十二
月

命同叅領武巴海統兵四百征瓦爾喀部招降屯長芬達
哩及屯衆五百餘戶俘阿庫里尼滿部千餘人獲
貂虎狐貉舍利獾水獺青鼠等皮無算九年六月
凱旋

命禮部諸臣出迎宴勞即以所獲分

賜叙功晉世職一等輕車都尉崇德二年隨武英郡王阿

濟格攻明皮島克之

賜裘服鞍馬銀布駝牛諸物

世祖章皇帝時屢遇

恩詔晉爵至二等男順治十一年八月卒

賜祭塋如例諡曰忠直從弟崇阿任佐領天聰八年隨征

明大同畧回雁堡我兵三人為敵所圍崇阿奮勇

援出之崇德元年隨征朝鮮破敵於桃山村六年
隨鄭親王濟爾哈朗圍明錦州會蒙古烏巴什等
遣人約降我軍克其外城敵猶巷戰崇阿偕衆擊
敗之七年隨貝勒阿巴泰征明入邊敗敵兵於渾
河岸進至山東克壽光縣城叙功予雲騎尉世職
順治元年隨豫親王多鐸追流賊李自成至潼關
屢擊敗來犯賊衆二年隨大軍下浙江攻拔湖州
城進取福建擊敗明唐王朱聿鍵兵衆於福寧晉

世職騎都尉五年隨征南大將軍譚泰征江西叛
鎮金聲桓敗賊黨王得仁於南昌其冬廣東叛鎮
李成棟犯贛州以應聲桓崇阿同副都統覺善往
援會巡撫劉武元總兵胡有陞等內外夾擊成棟
大敗單騎遁走六年破賊兵二萬於南康進圍信
豐克之成棟溺水死凱旋叙功晉世職三等輕車
都尉屢遇

恩詔晉一等輕車都尉景固勒岱之卒也無子以崇阿襲

二等男爵別以其弟之子巴音布襲一等輕車都尉世職十三年十月以景固勒岱親弟之子富勒都襲二等男爵仍復崇阿一等輕車都尉

聖祖仁皇帝康熙十八年崇阿乞休以其子采佳襲

達音布

子岱袞

達音布姓他塔喇世居扎庫木天命三年來歸隸滿洲正白旗任佐領隨

太祖高皇帝征伐輒為前鋒多所斬獲授騎都尉世職時

諸部歸順者為蒙古所誘數逃去達音布同副都統楞額禮率兵追至達岱塔敗蒙古步騎兵俘獲逃人無算六年

太祖親統兵征明奉集堡達音布先驅擒斬謀卒擊敗敵衆累功晉三等輕車都尉先是蒙古扎魯特貝勒昂安執我使臣送葉赫為所害又數遣兵要刼我使奪牲畜八年

太祖命貝勒阿巴泰等統兵三千往征之時達音布任前

鋒統領率精銳五十人乘夜渡遼河縱兵疾趨先至厄爾格勒知為昂安所屬地遂馳百餘里與叅領雅希禪侍衛博爾晉合兵進攻搗其巢昂安以二十餘人挽牛車載妻子遁達音布與雅希禪等引三十餘騎疾馳躡昂安及之騎士皆環立昂安直趨達音布達音布迎擊昂安敗走達音布彎弓注矢將射之昂安從者猝以小鎗迎刺達音布中口墮馬創甚而歿雅希禪等縱騎擊之斬昂安盡

殲其衆師還

命以所俘獲分賞從征將士

恩卹陣亡者以達音布長子阿哈尼堪襲職卒無嗣天聰八年

太宗文皇帝追錄勲臣

賜勅復以達音布次子阿濟格尼堪襲別有傳三子岱衮累從征伐授一等侍衛崇德二年從圍錦州攻明總督洪承疇第三營力戰陣亡

卹贈騎都尉世職子伊密遜襲

英俄爾岱

英俄爾岱姓他塔喇世居扎庫木

太祖高皇帝時從其祖岱圖庫哈理來歸授佐領隸滿洲
正白旗會界藩人犯境英俄爾岱奮勇迎敵破之
於薩爾滸天命四年隨大兵征明攻開原有蒙古
巴圖魯阿布爾者素驍勇降明為邊將出戰英俄
爾岱馳斬之六年克瀋陽授三等輕車都尉復進

擊明鐵嶺兵斬蒙古二人克遼陽晉二等天聰三年從

太宗文皇帝征明克遵化等十一城進攻明北京英俄爾岱與文臣范文程等留守遵化是年大兵所下石門驛馬蘭峪三屯營大安口及灤陽營等城俱叛明兵夜至遵化合攻英俄爾岱率兵擊却之平旦敵騎兵列陣以待我師將出戰敵縱兵突入我步軍營英俄爾岱麾其衆鼓勇奮擊敵兵退走斬殿

後者五人擒一人敵宵遁我師躡其後復斬騎兵
百步卒千餘遂以書諭降諸城五年授戶部承政
七年奉

命使朝鮮遺書責其王李倣倣上書報謝八年五月晉一
等輕車都尉六月察哈爾林丹漢遁走所屬皆降
上命英俄爾岱同副都統布爾吉率師偵之道遇察哈爾
來歸戶口千餘因率其部長上謁進獻裘馬先是
英俄爾岱與布爾吉遇察哈爾台吉布顏圖部衆

招之降不從誅二百餘人俘獲其衆還奏得

賞賜至是布顏圖餘衆三十人來奔告曰前者欲降不允
遂見屠僇幸逃匿得餘生也

上怒命盡追奪所賜物尋以考滿晉爵三等男崇德元年
八旗及蒙古諸貝勒以

太宗功德日盛宜正位號議令朝鮮王李倬亦具表啟請
遣英俄爾岱及叅政馬福塔尼堪率諸貝勒使者
致書朝鮮比至倬不見亦不納所致書陽令國人

延英俄爾岱等至議政府潛以兵環守英俄爾岱率諸使者奪民馬乘之突門出走倬遣騎以報書追及而別以書誡其邊臣令固守英俄爾岱等併奪之以

聞道遇明皮島兵遮我歸路擊走之是年七月以額駙佟養性嫁女用六十人為媵僕英俄爾岱知之不行阻止論罰鍰二年正月

上親征朝鮮克其國都圍李倬於南漢山城

命英俄爾岱與馬福塔賚

敕諭之倅感激稱臣以奏書至遂出降英俄爾岱復承

旨送倅還國都七月都統鄂莫克圖為貝勒豪格脅娶蒙

古台吉博洛女事下部議英俄爾岱實先見其女

以告鄂莫克圖及鄂莫克圖往視英俄爾岱復以

其言告貝勒坐謫論罰贖十月賚

勅冊封朝鮮朝鮮王敬謹無失禮三年以承政韓大勳盜

取庫物事坐稽察疎忽議應革世職得

旨寬免仍論罰四年復坐失察家人索借官商財物論革

世職罰贖

詔並免之尋授都統五年偕鄂莫克圖等往朝鮮義州詰

李倬罪六年三月奉

詔丈量地畝以道遇出征錦州軍離城遠駐不為阻還朝

又不以奏論罰贖六月睿親王多爾袞復圍錦州

英俄爾岱率師往濟其軍至則駐營高橋與大軍

會明兵望風引遁九月隨貝勒多鐸等圍守松山

城七年七月有副都統布山者以隱匿奸宄下獄
尋遇

恩赦令睿親王多爾袞約束不許隨征從獵及私往莊屯
英俄爾岱為之私請於睿親王令其往近邊牧馬
處行走部議英俄爾岱應罰鍰復奉

旨寬免八月往朝鮮鞠獄還奏稱

旨八年考滿晉三等子順治元年從睿親王入山海關破
流賊李自成是年改承政為尚書英俄爾岱仍任

戶部二年叙先後功超陞三等公三年奏請禁民間私售馬騾軍械火器以杜盜源從之四年復以考滿晉二等公五年二月卒年五十三英俄爾岱以娶饒餘郡王女授多羅額駙任戶部尚書十餘年既為都統仍攝部務

太宗嘗

諭六部諸臣曰英俄爾岱素性執拗而於本旗人亦間有狗庇朕思有全德者少彼能盡心部務辦事明決朕甚

嘉之其餘各部大臣不如彼者多矣子伊圖襲爵仕至

內大臣

蘇納

蘇納姓納喇葉赫貝勒錦台什同族

太祖高皇帝創業時蘇納棄兄弟來歸

命尚主為額駙編所屬人戶任佐領隸滿洲正白旗天命
四年

太祖既滅葉赫

命蘇納收其親屬並領之十年授叅領以其從征有功
賜勅免死四次尋擢副都統天聰元年

太宗文皇帝親征明錦州以大貝勒莽古爾泰等帥偏師

衛塔山運糧軍

命蘇納統八旗蒙古兵驍壯者截守塔山西路遇明兵二
千來戰蘇納領纛前進擊敗之乘勝追擊俘斬無
算獲馬百五十餘

賜所俘獲以犒其軍三年春同都統武訥格率精兵八十

人及蒙古軍征察哈爾降其邊境二千戶比聞降者睭我兵少謀害我兵以歸明於是盡殲其男子釋二台吉俘婦女八千有奇還以所獲

頒賜出征將士有差旋奉

諭責其殺降奪所給牲畜十月以蒙古人有自察哈爾逃入明國者

命同武訥格率兵四百人追躡捕獲百人驅馬駝牛羊以歸五年授護軍統領擢兵部承政從征明圍大凌

河城擊敗出戰敵衆及錦州援兵叙功授騎都尉
世職八年考滿晉三等輕車都尉

命免徭役專管佐領九年正月以隱匿丁壯削世職七月
任鑲白旗蒙古都統崇德元年從武英郡王阿濟
格征明北京攻鵬鶚長安諸嶺及昌平等城敗敵
五十六次復同步軍統領薩穆什喀合攻容城縣
取之及還以先衆出邊致後隊為敵敗潰坐罰鍰
奪所俘獲十二月從征朝鮮其寧邊城將率步騎

兵千餘來援蘇納及副都統吳塔齊等奪勇邀擊大敗之生擒其將二年六月法司議蘇納於朝鮮國王朝謁時亂班釋甲又擅離大軍由捷徑歸坐罰鍰三年八月以都統阿山之子塞赫為正藍旗洪科訐告臨陣退避鞠訊不實蘇納徇洪科証其事坐罰鍰罷都統任仍專管佐領事順治五年以疾卒

世祖章皇帝以其子蘇克薩哈有功授三等輕車都尉

念蘇納為勞績舊臣追復原職令蘇克薩哈併襲之蘇克薩哈

別有傳

阿什達爾漢

阿什達爾漢姓納喇葉赫貝勒錦台什從弟

太宗文皇帝諸舅也

太祖高皇帝初年滅葉赫阿什達爾漢率屬來歸授佐領隸滿洲正白旗天命六年二月從征明攻奉集堡圍其城時八旗並進諸將無出其先者三月攻遼陽城先登克之論功授一等輕車都尉

賜敕免死一次

太宗嗣位以阿什達爾漢典外藩蒙古事嘗奉使朝鮮並齎敕諭歸附諸蒙古部落天聰六年明遣使議和

上命阿什達爾漢與文臣白格龍什等往報之既盟而歸白格以阿什達爾漢與龍什等私取明饋遺事奏

聞

詔追奪其所取財物七年六月隨貝勒濟爾哈朗薩哈璘鞠獄諸蒙古部齎

敕諭二十道遺失其九所司奏劾論罰如律十月宣布

欽定律令於諸蒙古部落八年五月奉

命徵兵科爾沁會大兵於宣府左衛時

上親征察哈爾其汗林丹遁走海上殂於道所部潰散其屬

額爾德尼囊蘇等率衆來降

上命阿什達爾漢與前鋒統領吳拜等及額爾德尼囊蘇往

偵察哈爾汗子額哲九月携其台吉塞冷等還復

命曰察哈爾大臣若初他特等率千人而來者踵相接也旋奉

命至春科爾大會蒙古諸部分畫牧地使各守封疆復與諸貝勒訊獄斷罪十一月還報稱

旨令專轄一佐領事九年二月隨貝勒多爾袞等率兵萬人往收察哈爾汗子額哲四月師抵托里圖貝勒等遵上所授方畧遣阿什達爾漢偕其族孫護軍統領南褚先詣額哲母營見之額哲之母南褚女兄阿什達爾漢族孫女也既見諭之降額哲遂從其母舉部來降當我軍未至時有鄂爾多斯濟農圖巴者來招額

哲與盟而去阿什達爾漢察其有異志追及圖已
羈留之遂破其謀令悉還察哈爾之貨賄遺於鄂
爾多斯者又領兵畧明宣大界至山西多俘獲凱旋
上親迎勞之崇德元年六月授都察院承政

上御崇政殿侍臣已圖魯詹額爾克戴青後至阿什達爾
漢與承政多爾濟達爾漢面責之曰汝扈從臣何
擅離職守而後至乎叱出之十月偕文臣希福往
察哈爾喀爾喀科爾沁諸部明刑申禁宣

諭而還十二月從征朝鮮其國王李倬遁走南漢山豫親王多鐸率師追之圍其城朝鮮巡撫合兵萬八千來援分樹二柵悉衆出戰阿什達爾漢同貝子碩託帥驍銳競進大破其軍其副將以兵五千營山麓遙為聲援別遣兵百人沿河而下阿什達爾漢擊殲之復攻拔其營餘衆皆潰明年正月李倬降七月諭功晉三等男世襲會遣大臣往科爾沁巴林扎魯特喀喇沁土默特阿祿等部頒

赦詔并會諸外藩清理刑獄阿什達爾漢為正使三年五

月部議阿什達爾漢前往科爾沁部察審諸事徇
庇失實且濫收諸藩貝勒財賄應削職得

旨寬貫解部任追奪財物入官七月復任都察院承政五
年與叅政祖可法等疏奏時事畧曰

皇上欲恢張治道深思篤行之今諸國景附

朝廷清明而諸王以下至都統彼此觀望顧念身家
莫肯精白一心為國陳奏不知果無可言耶抑有
所畏忌而不敢言耶夫刑法者所以防民之姦也

散於法則麗於刑此不可追也今刑部斷獄不依
本律或從重論輒削其職臣思諸臣經戰陣出死
力恩授一官一旦有過豈可不論重輕而遽革之
乎臣等竊思先時簡選議事十人此時皆不稱職
宜罷斥又例職官陣亡者子孫襲兵士陣亡者妻
子受賞今未盡行惟

聖主裁察疏入

上嘉納之六年大兵圍錦州明總督洪承疇率師來援陳

師松山

上親統大軍擊之明師宵遁分部諸將以追我偏將伊拜等駐兵杏山阿什達爾漢按其營壘及斬獲多寡之數敵衆既潰

上合衆圍松山明總兵曹變蛟營於乳峰山堅壁不敢戰
乘夜棄山寨率部騎直犯中軍入

御營時右翼大臣侍衛等俱未歸部伍軍中大驚將士以死禦之始退

上以阿什達爾漢為故舊大臣受心膺寄常隨侍左右是夜乃安處帳中不至

御前防護遂歸本旗七年論松山失律諸臣罪罷承政任降世職為騎都尉尋以疾卒年六十三子三長席達禮次阿爾畢敦次阿爾賓席達禮襲世職別有傳

薩穆什喀

薩穆什喀滿洲正白旗人姓佟佳扈爾漢第三弟

也少從

太祖高皇帝征伐積功授三等輕車都尉世職征董夔率
十二人追敵至山下斬百人獲礮五十三人馬牛
羊千計

太宗文皇帝即位列十六大臣佐理鑲白旗事天聰四年
從征明灤州率衆射敵獲勝七年隨貝勒岳託等
征旅順口由陸地運舟於水衆皆乘馬薩穆什喀
建議曰兵既潛進何乘馬為於是率衆步行比臨

水次鑲黃鑲紅鑲藍三旗所運舟俱未至貝勒岳
託謂薩穆什喀曰汝可努力曰如貝勒命此城誓
必得不空返也遂與步軍統領巴奇蘭連舟先八
旗進身被一創戰益厲大軍繼進遂破旅順口八
月凱旋

太宗郊勞之

親酌金卮以賜先是薩穆什喀坐事削職至是復世職加
一等輕車都尉八年任叅領同貝勒杜度防守海

州十二月奉

命副巴奇蘭往征黑龍江呼爾哈部明年四月降其衆盡
取其地俘獲無算叙功加三等男世職授步軍統領
領崇德元年隨武英郡王阿濟格等征明入長城
同額駙蘇納率兵攻容城縣先登克之二年授議
政大臣復隨武英郡王攻皮島薩穆什喀督前鋒
兵渡江先抵岬與都統阿山葉臣等攻克之斬其
守將沈世奎七月叙功晉二等子是月任工部承

政四年同刑部承政索海分統左右翼兵往征索倫
部有達爾布尼阿哈爾都戶白庫都漢必爾岱四
人於伍庫爾城聚衆抗拒薩穆什喀帥左翼兵攻
克之隨攻鐸陳不下會佐領薩必圖等引兵來助
鐸陳阿撒津二城兵潛出截戰薩穆什喀設伏敗
之斬七十人五年師還

上郊勞賜宴旋因征索倫時所得三屯人民不加撫輯以
致復叛及博穆博果爾兵攻掠正藍旗輜重坐視

不救致士卒為敵所殺議應革職籍沒得

旨削世職免籍家產罰贖以懲薩穆什喀復奏辨曰博穆
博果爾攻掠時實率將士五十人擊敗其衆復追
里許值右翼索海潭布伏兵衝擊二人遂冒吾功
上命王貝勒及議政大臣等詳審會議以薩穆什喀巧辨
欺誑應論死籍其家

上念其舊著勞績從寬宥之部臣追論薩穆什喀駐防海
州時明知義州山寨有敵兵不嚴誠士卒警備以

致左翼屯丁多被殺掠依律罰贖明年從睿親王
多爾袞征明坐依附王貝勒私遣兵丁歸家及離
城遠駐復論革職籍沒乃

命以罰贖懲之七年復從大兵征明攻錦州敵兵來犯我
寨柵勢甚銳薩穆什喀力戰三敗敵兵錦州既克
復授騎都尉世職八年以疾卒子羅什襲

雅賴

雅賴滿洲正白旗人姓佟佳扈爾漢第七弟也

太祖高皇帝時從征烏拉畧地朝鮮數被創天命六年隨
大兵攻遼東及破蒙古兵俱有功又征察哈爾先
登殺敵俘獲甚衆天聰三年五月與叅領羅璧等
率兵千人畧明新城路遇其故將毛文龍部衆採
參者斬六十人毀其船九月同額駙揚古利等躡
捕逃人於雅爾古復遇文龍部衆殺九十六人擒
其千總三員及從者十六人以歸十一月

太宗文皇帝征明北京明巡撫袁崇煥來援圍我護軍營

城中敵兵亦出應雅賴奮勇力戰卻之五年從圍
大凌河城累戰皆捷正白旗士卒有歿於陣者雅
賴單騎入殺敵三人取屍而還七年征明旅順口
與副都統薩穆什喀同舟進敵據岍列陣以拒雅
賴起躍登岍大呼曰雅賴先登矣遂衝入敵陣黎
明與敵兵戰於城門身被一創督戰愈厲我兵或
少退輒手及之大敗敵兵論功授騎都尉世職崇
德二年授議政大臣六年以從圍錦州依附睿親

王多爾袞私遣兵丁歸家及離城遠駐議革職籍
其家之半得

旨從寬罰贖明年兵部追論攻錦州時明兵出犯鑲黃旗
汎我兵有未戰者雅賴坐狗隱應罰贖

上以雅賴素著勞績

特命免之八年叙征明錦州松山北京山東等戰功加一
雲騎尉順治元年隨睿親王破流賊李自成於山
海關定燕京二年復隨豫親王多鐸破流賊於潼

關平定河南江南叙功晉三等男兼一雲騎尉兩遇

恩詔晉一等男兼一雲騎尉八年三月擢戶部尚書四月以尚書巴哈納給餉不均為駐防河間佐領碩爾對所控雅賴不行奏

聞論罪罰贖尋罷尚書任康熙三年四月卒賜祭葬如例子花色襲

巴篤理

巴篤理世居佟佳以地為氏天命初與弟蒙阿圖等率衆來歸

太祖高皇帝命編所屬戶為二佐領使巴篤理與蒙阿圖分領其衆隸滿洲正白旗巴篤理蒞事有能與十大臣之列積戰功授三等輕車都尉世職十年明發兵航海至旅順口葺城駐守巴篤理從貝勒莽古爾泰攻克之盡殲明兵十一年明將毛文龍遣兵夜襲薩爾滸城中礮矢交發明兵退而結營巴

篤理率兵從山而下大呼乘之敵潰走追斬二百餘人天聰三年從

太宗文皇帝征明指揮本旗兵攻克遵化城有功晉二等輕車都尉

太宗親酌金卮勞之四年正月大軍克永平巴篤理隨貝勒濟爾哈朗等統兵鎮守復赴遷安招撫明侍郎郭某比至已遁去執其孥至永平贍養之三月明副將張宏謨率兵來侵巴篤理與前鋒統領屯布

祿以兵百人迎之遇伏兵截擊也布祿敗北巴篤
理殿後接戰其弟課約馬中矢巴篤理斬敵兵奪
馬與課約連斬三十餘人敵遂遁五月明兵圍灤州
時大貝勒阿敏鎮守永平不即赴援城垂破乃遣
巴篤理率兵進擊乘夜突圍入城方議併力拒守
敵發巨礮攻擊城樓焚守將納穆泰等度力不能
支相率棄城依阿敏阿敏亦棄永平遂從歸事

聞集廷臣議諸將棄城罪以巴篤理突圍赴援釋之五年

任禮部承政六年奉

命往朝鮮定職貢額數八年八月

太宗親統師征明至應州

命隨貝勒阿巴泰等往取靈邱縣之王家莊已篤理督衆

攻其堡既被創猶鼓勇奮擊中矢卒

太宗聞之泣下曰此朕舊臣効力多年致命疆場深可惜也

卹贈三等男以其子卓羅襲爵順治十三年追諡

敏壯

蒙阿圖

蒙阿圖姓佟佳巴篤理之弟也天命初偕其兄來
歸授佐領以丈量地畝有功擢正白旗副都統為
總理糧餉大臣克勤其職繼因多取田地又以餘
地私給漢官及擇各處腴地別立莊屯為本旗大
臣阿山所劾坐削職天聰三年

太宗文皇帝命率官八員兵三百人往征瓦爾喀

諭之曰爾等行軍宜嚴紀律毋妄殺毋剽掠歸附之衆皆編為民戶攜還所產貂皮諸物毋纖毫私取蒙阿圖

奉

命往俘獲男婦三千餘口及牛馬等物五年二月自寧古

塔奏捷凱旋

太宗至十里外迎勞蒙阿圖遙見即拜近前復拜行抱見禮禮畢設宴

太宗以蒙阿圖出征勞苦特撤御膳賜之叙功授騎都尉

世職是年任工部承政駐天瑞山一載緝獲逃人
無算從征明北京擊敗明兵於遵化又征呼爾哈
並以俘獲多論功晉三等輕車都尉六年大兵征
察哈爾

太宗遣蒙阿圖還瀋陽

命移餉貯遼河加意防護撤回阿巴泰等防禦兵守城及
催督喀喇沁人於法庫山耕種者八年考滿晉二
等輕車都尉崇德三年七月

召見諭曰爾今年老且復有疾不必管理部務宜閒居調
養病痊之日朕當起用爾等舊臣朕見之輒為心喜仍
不時朝見可也未幾卒於家子翁克任護軍叅領兼佐

領

欽定八旗通志卷一百五十六

欽定四庫全書

欽定八旗通志卷一百五十七

人物志三十七

大臣傳二十三

滿洲正白旗二

喀克都哩

鄂

塔瑪喇
阿濟格尼堪

薩弼圖

卓羅

瓦爾喀珠

喀克都哩

喀克都哩世居那木都魯以地為氏

太祖高皇帝時與其兄康果禮率衆來歸分轄其衆為佐

領隸滿洲正白旗授三等子爵

太宗文皇帝初即位以喀克都哩為正白旗都統天聰元年隨征朝鮮有功三年

上親統大軍征明

命八旗都統攻遵化城

授方畧分八隅列陣喀克都哩督所部兵薩木哈圖樹雲

梯先登衆繼之城遂拔明巡撫王元雅自殺

上嘉喀克都哩造攻具如法督兵先諸軍克城功

親酌金卮獎勞

優賚之晉爵二等子

賜號噶思哈巴圖魯言其勇敢善戰疾如飛鳥也明年正

月

上攻克永平明兵潰走昌黎

上遣教漢奈曼巴林扎魯特兵攻其城不克

命喀克都哩同都統達爾漢等率兵千人往助仍不克焚

其近城廬舍而還先是叙克遵化功薩木哈圖得

賜巴圖魯號授騎都尉世職並

諭喀克都哩曰薩木哈圖奮勇建功宜加愛惜自後攻城

但令隨衆並進如彼欲先登亦必阻之至是攻昌

黎薩木哈圖運木築柵復樹梯將登城聞

上命撤兵乃止

上以喀克都哩弗恤士卒申

諭切責五年五月同都統楞額禮分率左右翼步騎征明

南海島徵舟艦於朝鮮弗至師次海濱不能渡遂

還軍屢擊敗明兵之邀戰者俘獲甚衆八月從

上征明圍大凌河城喀克都哩率本旗兵軍其城之東北
城中食盡明總兵祖大壽率衆降乃班師六月從
上征察哈爾與諸將分路率兵攻取籍所俘人戶及金帛
馬牛羊以獻

獎賚有差七年

上以征明及朝鮮察哈爾宜何先

詢諸貝勒大臣喀克都哩奏言宜先征明以承

天佑協人情且利在神速攻其不備

上嘉納之八年喀克都哩家人訐其欲逃歸瓦爾喀以財物運藏那木都魯故屯

上曰喀克都哩豈有逃遁之理果欲負朕

天必鑒之遂不窮治其事仍以訐告者付喀克都哩殺之逾數月喀克都哩卒會有

詔分別舊臣勲績

賜敕書予世襲喀克都哩之子塞古德圖爾泰赴吏部述

其父功請襲

上命諸貝勒集議貝勒多鐸言喀克都哩之嫂和碩郡主
謂喀克都哩前此被首事屬實叅領吉思哈自呼
爾哈凱旋亦言呼爾哈人謂喀克都哩曾欲逃歸
諸貝勒並以奏

聞遂不予襲

鄂碩

鄂碩滿洲正白旗人先世居棟鄂以地為氏祖綸

布

太祖高皇帝時率四百人來歸

賜名魯克素授其次子錫爾泰為佐領長子錫罕子騎都

尉世職即鄂碩父也天命十一年蒙古貝勒卓哩

克圖所屬叛逃錫罕追及之盡殲其衆天聰元年

隨大貝勒阿敏征朝鮮率八十人先驅遇敵戰歿

太宗文皇帝念錫罕死事晉世職為三等輕車都尉以鄂

碩襲八年七月鄂碩隨豫親王多鐸征明攻前屯

衛斬其哨卒十二月奉

命與前鋒統領勞薩率將士往迎察哈爾部之來歸者是
年授佐領九年大軍招察哈爾部衆進征朔州至
崞縣遇敵哨斬二人獲馬四由平魯衛出邊敵兵
邀戰鄂碩與都統圖爾格擊卻之叙功晉世職為
二等輕車都尉尋擢前鋒叅領崇德元年鄂碩與
勞薩率兵百人偵明邊事至冷口斬哨卒三獲馬
十五二年叅領丹岱等往土默特貿易還鄂碩隨

前鋒統領武拜率將士赴歸化城護之擒斬明選
卒三年隨睿親王多爾袞征明由青山口入擊敗
明太監高起潛兵四年奉

命與前鋒叅領沙爾瑚達率土默特兵三百人畧寧遠鄂

碩遵

上方畧以前鋒挑戰敵人堅壁不出乃從錦州北界畧其
樵採者而還五年隨大軍圍錦州以前鋒敗敵騎
時錦州被我軍圍急明總督洪承疇率兵赴援

上聞之親統大軍營於松山杏山之間

命武拜等以偏師營高橋東鄂碩統遊卒偵躡敵有自杏山潰出者尾擊之既而杏山兵果潛出鄂碩偵知以告武拜武拜未即擊致潰卒復入城

上以鄂碩有統帥哨卒之責乃僅告知武拜不親行追擊予鞭責示懲六年復隨大軍圍錦州別將兵畧寧遠遇明兵六百騎鄂碩與前鋒統領鄂摩克圖引軍薄之大破敵寨燾二獲馬六十餘七年隨饒餘

貝勒阿巴泰征明毀界嶺口邊牆進師敗明總督
范志完兵於豐潤敵自密雲出劫我鎰重奮戰卻
之遂越燕京趨山東所至克捷師旋出邊明總兵
吳三桂遣步騎邀戰復擊之潰遁乘夜掩襲寨燄
三斬級數十擒哨卒二十九獲馬二百餘

世祖章帝順治元年四月從大兵入山海關擊敗流賊
李自成追至望都十一月追自成至陝州距潼關
立營賊據山為寨以拒我師鄂碩與前鋒統領努

三率兵拔其寨二年陝西既定大兵由河南下江
南鄂碩率八旗前鋒兵之半先行至睢寧縣敗敵
兵千餘人復隨端重親王博洛分兵征蘇州擊明
巡撫楊文驄舟師獲戰艦二十五趨杭州敗明魯
王朱以海兵擒其總兵一尋與護軍統領哈寧阿
等攻湖州克其城先是叙征明錦州山東及入關
破流賊功鄂碩晉世職至三等男及是叙陝西江
南浙江功晉爵二等男六年擢滿洲鑲白旗副都

統時明桂王朱由榔據湖南廣西鄂碩隨鄭親王
濟爾哈朗往征有功師還

賚白金三百兩八年授前鋒統領十三年擢內大臣兩遇
恩詔晉爵三等子復以其為

皇貴妃父晉三等伯十四年九月卒加贈為侯

賜祭葬如典禮謚剛毅以其子費揚古襲三等伯別有傳

錫圖庫

錫圖庫滿洲正白旗人姓烏扎拉先世居烏拉部

兄福蘭當

太祖高皇帝時率屬來歸予騎都尉世職尋卒錫圖庫襲其職任佐領兼前鋒叅領

太宗文皇帝天聰四年大軍既取明永平錫圖庫同叅領圖魯什等率兵循徼敵境擒哨卒二人獲馬十有
七五年七月奉

命偵敵大凌河生擒二人還

上統師往征圍大凌河城擊敗錦州援兵錫圖庫皆在事

有功六年隨大軍征明於宣府大同邊外分兵畧地多所俘獲八年同諸將畧蒙古錫爾哈錫伯圖地斬七十餘級獲戶口百餘及駝牛馬而還得分賜所獲是年叙功晉世職為一等輕車都尉九年同前鋒統領勞薩等入明邊克長城畧代州朔州斬獲甚衆崇德元年八月睿親王多爾袞征明寧遠錫圖庫率二十人前行至中後所及山海關東偵敵屢擒哨卒並獲其馬又於前屯衛設伏擊敗敵兵初

喀木尼堪部葉類等來歸居多博科地至是葉類
倡叛率所屬挈妻孥偕遁盜科爾沁諸部馬匹有
追捕者輒為所害十二月錫圖庫奉

命率前鋒護軍八人往會寧古塔副都統烏巴海督兵躡
追數旬圍之溫鐸招降不從葉類潛遁我兵盡殺
其黨九十四人俘婦女八十餘獲馬五十有六追
及葉類於山中射殪之二年五月凱旋

上遣大臣出迎五里宴勞叙功晉爵一等男五年七月

命同護軍統領濟什哈率所部兵並徵外藩教漢奈曼烏
喇特諸部兵征索倫部敗敵衆於甘河擒叛酋博
木博果爾之弟布固德復追擒博木博果爾籍戶
口千餘獲馬數百六年正月還

賜宴於北驛館晉爵三等子五月授本旗副都統七年隨
貝勒阿巴泰征明由薊州越燕京趨山東克究州
旋師錫圖庫分率右翼兵不與左翼期會先出邊
部議革副都統任

命從寬罰銀百兩八年十一月擢前鋒統領

世祖章皇帝順治元年隨大軍討流賊李自成擊賊將唐
通於一片石入山海關屢戰皆捷擒賊遊騎於三
河縣追擊自成至安肅獲馬百餘進征山西同都
統葉臣等取太原擊敗偽磁侯田見秀於汾洲又
敗賊於絳州二年正月叙功晉三等子時自成據
陝西大軍由潼關綏德兩路分進錫圖庫率兵趨
會擊敗延安賊衆自成遁湖廣錫圖庫移兵安陸

追至荊州殲賊無算獲船百餘三年隨肅親王豪
格征四川滅流賊張獻忠五年六月叙功晉一等
子時湖南郡邑尚為明桂王朱由榔所據錫圖庫
隨鄭親王濟爾哈朗征之六年正月大軍至長沙
錫圖庫同左翼前鋒統領努三先率兵渡江攻湘
潭努三破北門錫圖庫破西門遂定湘潭進克永
興城擒斬其總兵尹舉智杜貞明等獲馬七十船
四百尋偕諸將定寶慶府進定全州由榔將焦璉

等分三路來犯錫圖庫擊卻之又移兵攻克永安
關定道州七年正月凱旋

賜銀三百兩八年正月內大臣武拜洛什博爾輝等訐告
英親王阿濟格謀干政事王大臣集鞠錫圖庫坐
豫謀應斬籍沒爵除後洛什博爾輝以造言構讐
伏誅武拜亦坐附和削職籍沒

譚拜

譚拜滿洲正白旗人姓他塔喇父阿敦官都統嘗

從

太祖高皇帝征撫順招明遊擊李永芳來降譚拜初任佐

領

太宗文皇帝天聰五年大軍圍大凌河城明總兵祖大壽

遣百餘騎逸出譚拜與護軍叅領布顏圖追斬三

十餘人獲馬二十有四八年以克副任使予騎都

尉世職兼任叅領九年大軍征察哈爾收其降衆

遂征明代州忻州譚拜同前鋒叅領蘇爾德安達

立率四十人伏忻口明哨卒三百至擊斬過半崇
德元年隨武英郡王阿濟格征明敗敵燕京城北
趨盧溝橋遇敵復敗之二年同叅領丹岱薩蘇喀
等率護軍驍騎各四十畧明邊境次清河敵兵七
百據守奮擊之潰奪燾二並獲其馬三年隨貝勒
岳託征明入牆子嶺薄豐潤縣城擊敵墮壕殲殪
無算復擊敗明太監馮永盛等拒戰兵四年隨鄭
親王濟爾哈朗畧錦州率護軍破敵步兵於城南

是年七月叙功加一雲騎尉五年授兵部叅政六年兼任正白旗蒙古副都統七年冬隨貝勒阿巴泰征山東攻利津縣克其城八年春出邊遇明總督趙光抃范志完總兵吳三桂白廣恩等邀戰率本旗兵戰皆捷凱旋

齊白金是年十月叙功晉世職三等輕車都尉

世祖章帝順治元年隨大軍入關定燕京三年擢兵部尚書尋隨肅親王豪格征流賊張獻忠過陝西同

都統瑪喇希等擊敗叛鎮賀珍於雞頭關進次四
川屢擊敗獻忠賊衆復同都統李國翰渡涪江擊
敗賊渠袁韜四年遷吏部尚書先是叙入闕定燕
京功並以考滿兩晉世職為一等輕車都尉及獻
忠滅晉爵三等男嗣遇

恩詔晉二等男七年三月卒子瑪爾賽襲爵別有傳

星訥

星訥滿洲正白旗人姓覺爾察初為二等侍衛兼

佐領從

太祖高皇帝征明遇蒙古兵四百於塔山之北射其渠魁殪之遂敗其衆天聰七年

太宗文皇帝命與叅領蘇爾東阿等率兵三百駐守遼河先是我師征察哈爾星訥以二十人往張家口偵敵猝遇敵兵禦守四日夜俟貝勒阿濟格至請兵二百攻克之察哈爾部多爾濟塔蘇爾海倚山立寨列火器拒守星訥率護軍先登敵衆奔潰八年

上統大軍征察哈爾星訥隨額駙布顏代率蒙古兵進哈
麻爾嶺遇其部俄爾塞圖等率所屬戶口來歸納

之以

聞時察哈爾林丹汗西奔土默特其下相率歸順

上乃移師征明星訥同前鋒叅領席特庫等畧大同明將
自龍門率兵三千逆戰星訥擊之敗北斬獲甚衆

論功予雲騎尉世職尋授刑部叅政崇德三年同
承政葉克舒征黑龍江奏捷叙功並以其兄辛泰

弟西爾圖陣亡應得世職令併襲之晉三等輕車
都尉叅政吉思哈有女為雅什塔子婦新寡吉思
哈疾女歸省星訥之子阿思哈見而謀娶之雅什
塔訟於所司論罪星訥應革世職罰鍰降理事官
上命降罰如議免革世職四年授護軍叅領兼議政大臣
尋遷副都統六年二月授工部叅政三月隨鄭親
王濟爾哈朗圍錦州明總督洪承疇親自以兵六
萬赴援屯松山北岡星訥先登破其壁壘明援兵

繼至星訥屢擊敗之七年敗明總兵吳三桂白廣恩等兵於高橋八年擢工部承政

世祖章皇帝順治元年隨睿親王多爾袞入山海關擊流賊李自成以步兵破賊陣是年改六部承政曰尚書星訥仍任工部二年叙功授一等輕車都尉三年隨肅親王豪格師抵西安分勦賊於邠州賊潰遁進趨秦州賊將高汝礪率步騎迎拒大敗之與肅親王會師川中屢敗賊渠張獻忠兵凱旋晉太

子少師加一雲騎尉六年逆鎮姜瓖據大同叛星
訥隨大兵討之圍其城賊填塹毀垣簡驍勇蒙盾
突犯星訥率將士持短兵力戰却賊賊背城為陣
復以火器來攻星訥親督精銳馳壓其營大兵乘
之賊兵不能支殲其勁兵畧盡七年遇

恩詔晉爵二等男八年都統額克青等舉發英親王阿濟
格令其子勞親以兵衆迎睿親王喪謀干政法司
鞠議星訥隸王属下雖未與謀第不即奏効且為

王趣召勞親應罷尚書任又議其在工部擅撤
昭陵工役五百人及不補植

陵樹罪革世職籍家產半九年復任工部尚書列議政大
臣十年

上以星訥宣力有年衰老可念

命以原官加一級致仕十四年自陳戰功請復世職部議
星訥前任工部獲罪應削

恩詔所加之爵仍留戰功所得世職奉

旨復一等輕車都尉兼一雲騎尉予世職康熙十三年卒
賜祭葬孫巴爾達襲

準塔

準塔滿洲正白旗人姓佟佳扈爾漢第四子也天
聰八年授騎都尉世職任叅領同叅領鰲拜等率
兵畧明錦州復與前鋒統領勞薩等率將士百人
往迎察哈爾國來歸者崇德二年隨武英郡王阿
濟格征明皮島王以敵兵堅守不能克集諸將問

進取之策準塔與鰲拜對曰我二人先登誓必克之否則不復見王遂連舟越衆渡海舉火為號以待後師敵兵據堡列陣準塔與鰲拜冒矢石奮勇衝擊遂取其島叙功超授三等男

賜巴圖魯號尋擢任都統隨貝勒岳託征明至密雲攻牆子嶺八旗並進準塔先據嶺以導諸軍遂毀邊城入敗明內監馮永盛及總兵侯世祿軍三屯營守將以步騎三千截我輜重同都統武賴擊敗之連

敗敵兵二千於董家口遂往畧地克取二城叙功
晉爵二等男六年三月隨睿親王多爾袞征明錦
州以聽從遣兵回家離城遠駐論罪應革職籍沒得
旨改輸罰鍰九月

命隨安平貝勒杜度等圍錦州有功七年復同都統葉臣
等率將士鎮錦州先是圍錦州時城內明兵出犯
鑲黃旗壕塹三旗護軍避敵壕內王貝勒等袒護
不報準塔坐徇情附和論罰

詔免之明年隨征明山東與都統葉克書等遣將領攻孟家臺以調度失宜致傷士卒且誑稱率五人突入敵圍衝出敵陣論罪革巴圖魯號降為一等輕車都尉罰贖十二月復鎮錦州順治元年從睿親王入山海關擊流賊李自成與都統譚泰等追至真定大破之賊焚輜重倉皇遁去於是燕京迤北居庸關內外各城及天津真定皆降叙功復授爵為三等男二年正月率右翼兵隨饒餘郡王阿巴泰征

山東平定郡縣趨江南時明福王朱由崧遣兵渡河圍徐州沛縣李家樓準塔督兵馳擊敗之擒斬其將六人明兵赴河死者無算下徐州奉

旨屯兵鎮守五月自徐州進兵南下擊敗明副將高祐軍於宿遷師次清河明總兵劉澤清率步兵四萬船千餘據黃淮清三河口連營十里準塔遣副都統康喀賴等率兵渡清河列營相拒以礮擊敗敵艦復遣都司楚進功率步兵六百人拒黃河北岸鳴

礮相應隨分兵兩路一自清河上遊進擊一攻對岸馬步敵兵俱敗之合軍追至淮安界斬其副將二叅將一有偽新昌王者潛遁海島雲臺山聚衆攻陷興化準塔遣兵進勦破其巢穴擒斬之通州如臯泰興等城皆下遂定淮安鳳陽廬州望風納款叙功晉爵三等子仍

賜巴圖魯號三年奉

命隨肅親王豪格勦流賊張獻忠於四川賊糾衆迎戰準

塔指揮八旗前鋒及兩黃正白三旗騎兵奮勇進擊俘斬甚衆復同貝勒尼堪等分兵攻克遵義夔州茂州榮昌富順內江資陽諸郡縣川寇悉平復隨肅親王勦陝西賊黨武大定等四年凱旋卒五年論準塔前後功加世爵為一等子無子以弟阿拉密襲十二年追謚曰襄毅

詔立碑墓道

阿濟格尼堪

阿濟格尼堪滿洲正白旗人姓他塔喇天聰八年襲父達音布三等輕車都尉世職任叅領從

太宗文皇帝征察哈爾由大同入明邊與護軍統領雅賴擊敗明兵於崞縣師還復同叅領阿爾津至山海關偵敵多斬獲崇德元年從

上征朝鮮遇明寧遠守邊兵擊敗之三年隨貝勒岳託征明過北京破總兵侯世祿軍追斬其護印者獲其印與馬四年擢護軍統領隨肅親王豪格攻錦

州設伏連山擒五人獲馬七六年鄭親王濟爾哈
朗統兵圍錦州阿濟格尼堪以七十人設伏敗敵
衆進攻杏山領纛直入敵營敵大潰時錦州城中
蒙古諾木齊等願投誠為明總兵祖大壽所覺以
兵圍之未得出阿濟格尼堪偵知之乘夜薄城力
戰率兵先登克其郭援諾木齊等以歸旋擊松山
兵兩戰皆捷

上以阿濟格尼堪年少能奮勇殺敵

賚白金四百兩晉一等輕車都尉是年八月明總督洪承疇集諸鎮兵援錦州

上親統大軍駐營松杏兩山之間截其糧道明總兵吳三桂唐通等潛遁

上召阿濟格尼堪

親授方畧與護軍統領鰲拜等追擊大破之八年八月奉命駐防錦州九月鄭親王攻取中後所前屯衛阿濟格尼堪率所部及蒙古兵攻中前所明總兵黃色遁拔

其城復追捕城中逸出者皆就獲叙功加一雲騎尉

世祖章帝順治元年四月睿親王多爾袞統兵入山海關擊流賊李自成阿濟格尼堪率護軍破賊追至望都叙功晉一等男十月隨豫親王多鐸追勦自成取道河南渡孟津薄潼關賊鑿重壕以阻我軍賊將劉方亮糾衆千餘來犯阿濟格尼堪同護軍統領圖賴阿爾津等奮戰賊挫衄棄夜侵正白旗

護軍驍騎營復擊却之連破賊二營領兵踰壕塹躬冒矢石先登城賊衆驚潰或竄或降大兵俱入關二年正月進征西安自成由商州竄湖廣豫親王奉

詔征江南四月至淮安遣阿濟格尼堪率護軍趨揚州列營城北合諸軍攻克其城獲戰艦二百餘渡江至江寧追擊明福王朱由崧於蕪湖敗其舟師捷

聞晉爵三等子三年隨端重親王博洛定浙閩攻克金華

衢州破仙霞關下建寧延平明唐王朱聿鍵遁走
汀州阿濟格尼堪同護軍統領都爾德追擊至城
下率精銳先登擒斬聿鍵其總兵姜正希糾衆二
萬赴援阿濟格尼堪指揮將士擊之斬殺過半明
年凱旋晉爵一等子

賜敕予世職勿替五年授正白旗滿洲都統六年隨鄭親
王征湖廣列叅贊大臣是時明桂王朱由榔遣其
總督何騰蛟總兵王進才馬進忠等據湖南郡邑

阿濟格尼堪至長沙與兵部尚書阿哈尼堪領將士先驅次湘潭遇迎戰者輒擊敗之破北門入騰蛟就擒追勦潰衆於湘鄉盡殲之遂趨寶慶距城七十里進才進忠糾衆抗拒我軍分步騎更番進戰直薄城東門進才等潛遁追勦之沅州靖州進定全州七年正月班師

賜白金五百兩晉爵三等伯列議政大臣四月卒

予祭葬如典禮謚勇敢子伊理布襲別有傳

薩弼圖

薩弼圖滿洲正白旗人姓他塔喇先世居扎庫穆
父沙津當

太祖高皇帝時率衆來歸授佐領薩弼圖其長子也沙津
卒代管佐領

太宗文皇帝天聰八年以克副任使予騎都尉世職尋無
任叅領崇德四年隨承政薩穆什喀索海征呼爾
哈部師至黑龍江薩弼圖俘獲丁壯百餘進攻鐸

陳阿薩津二城敵兵四百逆戰薩弼圖同佐領卓
卜特等率兵九十奮擊斬五十人餘衆潰走索倫
部長博木博果爾以兵助呼爾哈部抗拒我師薩
弼圖同副都統伊遜等設伏掩擊斬七十人五年
四月凱旋叙功加一雲騎尉七月隨大軍圍明錦
州刈其城西田禾敵由城西北隅出發鎗礮拒戰
薩弼圖偕衆衝擊敵卻走逐之抵城壕復移兵設
伏松山要路擊敗敵步兵旋駐守駱駝山城敵兵

二百來犯薩弼圖督兵截擊盡殲之六年率兵薄
錦州城駐營跨壕作橋敵出樵採薩弼圖馳擊斬
十人生擒九人復斬其持弓矢者五人翼日城中
出兵投火藥欲焚橋擊之適既而步騎全集欲奪
壕門薩弼圖迎斬二人敵潰却時明總督洪承疇
據松山以馬兵來刦我紅衣礮薩弼圖先衆擊卻
復偕衆步戰破敵步兵三營敘功晉世職為三等
輕車都尉旋擢正白旗滿洲副都統七年十月隨

貝勒阿巴泰征明由界嶺口毀邊牆入擊敗明總
兵馬科轉戰至山東以雲梯攻克平度州城

世祖章皇帝順治元年隨睿親王多爾袞入山海關擊流

賊李自成督後隊兵有功既定燕京同都統葉臣
巴哈納招撫山西自成偽將陳永福據太原薩弼
圖率兵圍城屢擊敗出拒賊衆山西既平移師征
陝西自成兄子錦據延安以賊衆迎拒薩弼圖七
戰皆捷復同前鋒統領錫特庫攻破自成賊寨叙

功並三遇

恩詔晉爵至二等男尋以年老致仕十八年卒

賜祭葬如例子果里襲爵

卓羅

卓羅滿洲正白旗人姓佟佳三等男巴篤理第三子也天聰八年襲父爵無任佐領崇德三年隨貝勒岳託征明燕京明太監馮永盛率兵拒戰卓羅以三百人擊敗之進征山東屢敗敵衆四年畧錦

州入其郭擒守備一人六年大軍圍錦州明總督
洪承疇率衆赴援駐松山卓羅隨武英郡王阿濟
格擊敗之七年復破松山兵於山北八年授刑部
叅政順治元年從入山海關擊敗流賊李自成二
年叙功晉一等男任正白旗副都統三年隨順承
郡王勒克德渾征湖廣敗自成餘黨一隻虎於荊
州凱旋

賚黃金十兩白金三百兩先是明桂王朱由榔據武岡以

其總兵王進才等分據長沙衡州寶慶

上命恭順王孔有德統師征之至是

遣卓羅同副都統藍拜赴有德軍協謀進勦四年自岳州趨長沙進才聞大兵至遁走卓羅同藍拜追擊敗之遂與智順王尚可喜擊敗其總兵徐松節軍統舟師還長沙遣叅領張國柱扎蘇藍等敗總兵楊國棟於天心湖卓羅會合孔有德軍趨祁陽由熊羆嶺入城斬其總兵副將各一進攻武岡州擊敗

其安國公劉承允於夕陽橋承允降由榔遁桂林
遂取武岡五年師還復

賚黃金十兩白金三百兩六年考滿加一雲騎尉旋擢禮
部尚書列議政大臣七年調都察院左都御史八
年二月兼鑲白旗滿洲都統閏二月

上甄別部院大臣以卓羅緘默曠官罷左都御史專任都
統九月擢吏部尚書三遇

恩詔晉爵至一等子兼一雲騎尉九年十一月授靖南將

軍率兵征廣東旋以廣東漸平

召還十一年復任吏部尚書十二年八月

命同都統阿爾津率兵駐防荊州初朱由榔稱號於粵孫

可望李定國白文選等皆以張獻忠餘黨附由榔

竊王號至是據辰州十三年八月卓羅同阿爾津

自澧州常德進征辰州可望焚舟夜遁卓羅與副

都統泰什哈護軍統領費雅思哈等率兵渡江攻

發其伏追擊至瀘溪累戰破之偽叅將段文科及

守備四員來降復辰州十四年可望率所部赴長沙歸順定國文選等隨由榔竄入雲南十五年寧南大將軍宗室羅託自湖南定貴陽

上命平西王吳三桂由四川進征南將軍卓布泰由廣西進而卓羅隨信郡王多尼以師會之規取雲南十六年正月合攻雲南城下之屢敗文選定國兵遂克永昌騰越追勦至南甸乃還

詔留卓羅及都統伊爾德分八旗兵駐守雲南

賚蟒服鞍馬時由榔奔緬甸定國竄據孟艮復謀入犯約
降將高應鳳為內應以由榔印劄誘元江土司那
嵩倡叛十月卓羅同前鋒統領白爾赫圖叅領穆
克爾等擊敗賊衆於磨隴口賊將馬秉忠孫應斗
馬忠君皆敗卻進師鑿壕困之以雲梯克其城斬
應鳳於軍那嵩自焚死殲其黨無算十八年定西
將軍愛星阿同吳三桂征由榔於緬甸

詔卓羅駐守雲南是年十二月緬人執由榔以獻雲南平

康熙元年四月奉

詔率駐守雲南八旗兵還京叙功晉爵二等伯世襲七年

卒

予祭葬如典禮謚忠襄以其孫赫特赫襲

瓦爾喀珠瑪喇

弟伊瑪喇

瓦爾喀珠瑪喇姓那木都魯世居瓦爾喀渾春地
祖察禮當

太祖高皇帝時率衆人來歸隸滿洲正白旗珠瑪喇自少

扈從

太宗文皇帝征討任佐領時葉赫有同名者

命稱瓦爾喀珠瑪喇以別之天聰八年

賜敕授騎都尉世職尋率前鋒十人追獲叛逃蒙古四十

三人

特予優賞崇德二年同佐領喀凱等分路征瓦爾喀於額

勒約索額黑庫倫僧庫勒諸路俘獲甚衆三年論

功加一雲騎尉授吏部理事官四年三月隨貝勒

岳託征明乘夜升雲梯攻克故城縣明總兵侯世
祿以兵赴援珠瑪喇徒步突入敵軍力戰敗之被
創甚猝遇明內監高起潛軍負創奮擊敵敗北十
月隨肅親王豪格畧錦州破明邊城兵進至太平
寨敵嚴陣以待珠瑪喇復徒步大呼衝鋒入陣斫
毀鹿角中創不退敵兵大潰十一月隨承政索海
薩穆什喀統左右翼兵征索倫部珠瑪喇俘獲十
九人進攻呼爾哈之雅克塞城我軍火焚其郭佐

領和託先登珠瑪喇繼之克其城師還黑龍江濱
呼爾哈潰衆復合烏魯蘇屯之博木博果爾兵六
千來襲我正藍旗後隊珠瑪喇與索海設伏掩擊
殲敵畧盡五年六月晉三等輕車都尉六年隨鄭
親王濟爾哈朗征明圍錦州敗松山騎兵明總督
洪承疇赴援立營松山西北我右翼兵與戰失利
敵兵環攻左翼軍珠瑪喇力戰敗敵礮傷頷氣絕

上震悼

賜驗具三日復甦奏

聞

上甚喜令加意調養勿即隨征尋以監造

盛京塔工告成

賞賚甚優

命率兵防守錦州諸山寨明兵來犯戰竟夜敵潰走斬四十餘級獲雲梯及軍械明年晉二等輕車都尉八年考績晉一等

世祖章帝順治元年珠瑪喇隨睿親王多爾袞入山海
關擊敗流賊李自成兵復勦滅馬山口土賊叙功
加一雲騎尉二年十月調戶部理事官十一月同
都統巴顏等率兵會定西大將軍何洛會征流賊
張獻忠自西安進師屢挫賊三年

上命肅親王豪格代何洛會統軍趨階州聞賊衆屯禮縣
南遣珠瑪喇分兵擊之賊驚竄復與護軍統領鰲
拜進征西克獻忠既滅乃班師六年隨英親王阿

濟格討大同叛鎮姜瓖至左衛賊列兵城外迎戰
珠瑪喇擊走之復左衛旋勦賊寧武闕賊於山岡
列礮以拒珠瑪喇同叅領烏庫禮率師疾馳據岡
脊大破賊營偽總兵劉偉遂以闕降七年叙錄勞
績舊臣晉爵三等男

予世襲罔替八年擢正白旗副都統遇

恩詔累晉一等男十年三月卒於官年五十有三

予祭葬如例祀四川名宦弟伊瑪喇初任前鋒侍衛順治

三年隨肅親王軍於四川賊黨趙雲桂圍保寧伊瑪喇登城射中雲桂目賊駭走我師乘之大捷至是襲兄珠瑪喇一等男爵尋授叅領康熙十三年陝西提督王輔臣叛應逆藩吳三桂伊瑪喇隨揚威將軍阿密達討之十四年五月師至寧州賊兵千餘抗拒擊之潰遂復寧州九月進攻平涼距城八里輔臣糾賊萬餘迎戰伊瑪喇隨貝勒洞額擊敗其衆十五年隨撫遠大將軍圖海復攻平涼至

城北虎山墩偵賊賊合步騎突至伊瑪喇督衆奮
戰賊敗北十八年搜勦棧道益門鎮諸路賊營敗賊
將陳君極二十一年賊平還京二十七年以老疾乞
休三十四年五月卒亦祀四川名宦次子滿色襲
爵

世宗憲皇帝御極

恩詔察奏効力行間未議叙者兵部列伊瑪喇名進
賜加雲騎尉世職與長子能泰襲

蘇拜子 和託

蘇拜滿洲正白旗人姓瓜勒佳前鋒統領武理堪之次子也蘇拜年十五從

太祖高皇帝征蒙古有功授侍衛兼管佐領事

太宗文皇帝天聰九年隨大軍征察哈爾收降林丹汗子額

哲遂入明邊攻代州明兵三百自寧縣赴援蘇拜

先衆迎戰敵潰遁崇德元年從征朝鮮破敵桃山

村三年任護軍叅領隨貝勒岳託征明自牆子嶺

入邊越燕京擊敗明太監馮永盛軍五年大軍圍
明錦州蘓拜屢擊却松山杏山敵兵又同都統圖
爾格等設伏於烏忻河口多所俘獲敵兵千餘襲
追戰卻之護輜重以歸六年復圍錦州敗松山騎
兵又敗明總督洪承疇三營步兵叙功予世職騎
都尉加一雲騎尉七年隨貝勒阿巴泰征明至山
東屢敗敵馬步兵攻克樂安昌邑二縣八年凱旋
晉世職三等輕車都尉

世祖章皇帝順治元年隨睿親王多爾袞入山海關擊敗
流賊李自成是年冬隨大軍西勦自成取道土默
特鄂爾多斯入邊鑿黃河冰濟師擒斬賊衆明年
春至榆林賊乘夜襲我蒙古營蘓拜與護軍統領
徹爾布往援擊敗羣賊旋軍遇伏復戰卻之進征
延安七戰皆捷自成走湖廣躡追之至安陸屢破
賊營斬獲無算三年署護軍統領隨肅親王豪格
征流賊張獻忠敗賊將高汝礪於三寨山進擊獻

忠於西充連敗賊衆我正藍旗軍為賊所困蘇拜
同護軍統領阿爾津率兵趨援大敗賊五年還京
授護軍統領先是叙入關及勦滅自成功洊晉一
等輕車都尉加一雲騎尉及獻忠滅叙功並三遇
恩詔晉爵至二等子八年正月同其兄武拜及內大臣洛
什博爾輝等舉發英親王阿濟格謀干政罪狀議
叙晉一等子加一雲騎尉二月洛什博爾輝以諂
媚諸王造言構釁伏誅蘇拜與武拜並坐附和罷


任削職籍沒又以睿親王葬時私置御用服飾蘇
拜徇隱不舉又王欲移駐永平蘇拜曾與密謀論
死得

旨寬免九年起為正白旗副都統十三年擢內大臣十五
年

上念其戰陣有功復爵一等男世襲旋授領侍衛內大臣
康熙三年十二月卒

賜祭葬如典禮謚曰勤僖子昂安巴襲爵第三子和託初

任侍衛康熙十五年以叅領從征陝西叛鎮王輔臣至平涼城北擊敗賊衆十六年從征逆藩吳三桂至湖廣於攸縣河岸擊敗賊將王國佐等又敗賊將胡國柱等於永興十九年由廣西征逆孽吳世璠敗賊將何繼祖等奪石門坎黃草壩進薄雲南城敗賊將胡國柄劉起龍叙功予世職騎都尉加一雲騎尉尋任護軍叅領五十二年卒子巴爾泰襲職



欽定八旗通志卷一百五十七